



Saramentaziun 2025 en preschientscha da papa Leo XIV

Giusep Capaul, Mustér

FORUM

Tradiziunalmein ha la saramentaziun dils novs gardists papals a Roma – uonn eisi stau 27 – liug mintgamai ils 6 da matg. Seregurdau vegn dils 147 gardists papals che han stuiu schar quei di igl onn 1527 lur veta, defendend papa Clemens VII tier la sblundergiada, numnada «Sacco di Roma», tras soldatesca selvadia jastra.

Uonn ei il datum usitau vegnius refretgs – pervia dalla mort e sepultura da papa Francestg duront la sedisvacanza – aschia che la saramentaziun dils gardists ha giu liug l'emprema sonda d'october.

Excepsiunalmein en preschientscha dil papa

Prest 60 onns eran spirai dapi la davosa gada ch'il papa regent (lu Paul VI) aveva assistiu persunalmein alla saramentaziun. La preschientscha dil niev Papa Leo XIV ei pia stau ina rara e gronda honur. Il cau dalla baselgia catolica ha priu la ca-

schun d'engraziar pils prezios survetschs che la Garda svizra ha prestau ad el ed alla Baselgia duront varga 500 onns.

Bia prominenz svizra era presenta

Numerus hosps d'honor ord Svizra han assistiu alla saramentaziun. Era quei ha tradiziun. La presidenta dalla Confederaziun, cuss. fed. Karin Keller-Sutter, ei vegnida retscharta en audienza privata dil niev papa. Presents alla cerimonia da saramentaziun fuvan era la presidenta dil Cussegl naziunal, Maja Riniker ed il parura dil Cussegl dils cantuns: Andrea Caroni. La Conferenza episcopala svizra ha msgr. Joseph Maria Bonnemain, uestg da Cuera, representau.

Secapescha ch'ils dus cardinals svizzers Kurt Koch e Paul Emil Tscherrig eran presents, sco era il schef dall'armada Thomas Süssli ed aunc biars auters representants dalla baselgia, politica e digl Uri sco cantun d'honor.

Il papa ha salidau persunalmein cuss. naz. Martin Candinas

Martin Candinas, Rabius/Cuera, ei ve-

gnius salidau persunalmein da papa Leo XIV. Il cusseglier naziunal sursilvan, Martin Candinas, ei dapi il fenadur dad uonn president dalla Fundaziun dalla garda svizra el Vatican. El ei daventaus successur dalla a. cuss. fed. Ruth Metzler-Arnold. Lezza ha renunziu al presidi suenter ch'ella era vegnida elegida parsura da Swiss Olympic.

Cuss. naz. Martin Candinas ei buca staus per l'emprema gada presents tier la saramentaziun dalla Garda papala a Roma. Sco president dil Cussegl naziunal – e pli ault Svizzer – ha el representau leugiu nossa tiara 2022/2023 ed aschia giu caschun da nuar contacts cun la capitala dalla Baselgia catolica.

La Fundaziun dalla Garda Papa svizra a Roma, eregida igl onn 2000, sustegn finanziyalmein, materialmein e socialmein la Garda papala. Gia ha ella realisau cun summas considerablas gronds projects. Igl ei ina gronda e biala missiun per nies magistrat sursilvan ed el medem temps era honur ch'el ademplescha cun ideal e perschasiun.



Sia Sontgadat il Papa Leo XIV en discuors cun il cuss. naz. Martin Candinas.

FOTO MAD